



Senin, 08 Maret 2021
Ogen: Job 10-1-6



Turiken Isi Pusu



Kitab Jop eme Kitab Kepentaren man kalak Jahudi. Inti kitab Jop salah sada eme maka kalak bujur pe banci ngenanami kiniseran i babo doni enda. Tangkas maka Jop ndatken erbage kiniseran subuk mate anak-anakna kerina, radas kerina erta-ertana janah keru dagingna kena pinakit. Janah teman geluhna pe nadingken ia alu nadingken kata-kata si pagit megikenca, Nina ndehara Jop man bana, "Lalap denga kin atendu erkemalangen man Dibata? Sumpahilah Ia, jenari mateken bandu!

La cukup terjeng i je maka reh ka telu kalak teman-teman Jop. Kalak enda me si mewakili perukuren (Teologi) paksa si e maka intina nina, "akuilah kesalahendu Jop. La mungkin si enda jadi la erkiteken dosa-dosandu." Perukuren si bagenda pe tetap nge lit asa genduari maka adi lit kalak ngenanami kiniseran megati si kawitken ras dosa-dosana. Termasuk tupung dirinta i bas kiniseran maka megati si inget dosa-dosanta.

Emaka ku ja nari me Jop ngadu-ngadu adi kerina kalak nadingken ia ras nalahken ia. Tapi ia jine la ietehna kai salahna maka jadi bage man bana. Adi kin erkiteken dosana, maka kalak si lalan dosana asa ia ma arusna seran ka si inanamina? Erdandanken si e maka labo ku ja pa pe iturikenna selain man Tuhan ia ngadu-ngadu ras nuri-nuri. Adi kita lit kiniseranta, ku ja kita nuri-nuri? Enterem si idah maka FB me ingan kalak nuri-nuri. Malah lit status si namaken bas FB, "racuni kam min." Ertina, labo erkedungen persoalen pusuhta ndai, tambah kalak simetehsa tapi la erkedungen, sibanci jadi tambah persoalen, imbang rubat ras kalak si rate nembek. Menaken genduari nari mari si usih Jop maka kerina isi pusuhna iturikenna man Tuhan.

